

նրանց յիշատակը մինչեւ այսօր եւս թնդում է եւ բոլոր հէքեաթների ու զըոյցների մէջ շարունակ լսում է նրանց անունը եւ գրեթէ առասպելական քաջագործութիւնները: Մինը Բաղդատի խալիֆայ Հարուն-էլ-Ռաշիդն է, միւսը՝ Շահաբբաս Ա.ը: Այսօր եւս ճանապարհորդելով Պարսկաստանում եւ Անդրկովկասում, Թիւրքաստանում, Աֆղանիստանում, Անդրկասպեան երկրում, որոնք Շահաբբասի ժամանակ Պարսկաստանի մասերն էին կազմում, կարող էք հանդիպել բազմաթիւ աւերակ եւ շատ տեղ դեռ կանգուն քարվանսարայների, կամուրջների ու մզկիթների, որոնք կոչւում են Շահաբբասի անունով: Աւանդութիւնը ժողովրդի բերանով ասում է, որ Շահաբբաս կառուցել է 1001 քարվանսարայ, 1001 մզկիթ, 1001 կամուրջ. թէ ինչո՞ւ անպատճառ 1001 թիւն է գործածւում, չգիտեմ. բայց այսօր եւս Պարսկաստանում առանց այդ քարվանսարայների անկարելի կը լինէր ճանապարհորդել, մանաւանդ կարաւանների համար: Շահաբբաս կառուցել է այդ քարվանսարայները կարաւանների իջեւանի համար, առեւտրական յարաբերութիւնները դիւրացընելու նպատակով:

Առհասարակ բոլոր մահմետական, թէ՛ ժամանակակից եւ թէ՛ ոչ-ժամանակակից պատմագիրները վերին աստիճանի գովասանքով են խօսում Շահաբբասի մասին, իբրեւ մի աշխարհաշէն, իմաստուն եւ արդար թագաւորի, որ իր մեծ գործերի համար «ջաննէթ - մաքեան»